

Date – 01/06/2025

Time - 7:30 -7:40Hrs

AKASHVANI AIZAWL

REGIONAL NEWS BULLETIN

HEADLINES (MORNING)

- Mizoram larsap General Vijay Kumar Singh leh Chief Minister Pu Lalduhoma te chuan, ruah sur vanga Mizoram hmun hrang hranga chhiat tawkte an tawrh pui thu an sawi.
- Ram pum huapa kum tling lo inneihna tibo tura beihpui thlakna-National Campaign "Bal Vivah Mukht Bharat" (Child Marriage Free India) chu Mizoramah pawh kalpui mek a ni.
- Power & Electricity Department chuan ruah leh thlipuiin Mizoram a nuai chungchangah mipuite hnena ngenna leh hriattirna thuchhuah an siam.
- Operation Shield kalpui mek zingah Gujarat-a district hrang hrangah Civil Defence mock drills neih a ni a, ramri-a Kutch, Banaskantha, leh Patan-ah te pawh neih a ni.

<><><>

GOVERNOR & CM

Mizoram larsap General Rtd. Vijay Kumar Singh leh Chief Minister Pu Lalduhoma te chuan, ruah sur vanga Mizoram hmun hrang hranga chhiat tawkte an tawrh pui thu an sawi a, mipuite chu fimkhur lehzual turin an chah bawh.

Governor hian social media kaltlanga thu chhuah siamin, tunhnai ruahsur nasa avanga Mizoram hmun hrang hranga chhiatna thleng leh hemi avanga nunna hial chan an awm chu pawh a ti takzet tih a sawi a. Khawhar chhungte leh In leh lo chante thinlung takin a tawrhpuia. Hliam tuarte pawhin damna an chan leh thuai theih nan duhsakna a hlan. Chhiatna kara chhanchhuah hna theihtawp chhuaha thawktute hmalakna chu fakawm a tih thu a sawi bakah, ruah a la tlak belh zel avangin mipuite fimkhur tur leh, a bikin chhiatrupna thlen theih maina bul hnaia awmte fimkhur lehzual turin a chah a ni.

Chief Minister Pu Lalduhoma pawhin social media kaltlanga tawrhpuina thu sawiin, Mizoram hmun hrang hranga chhiatna thleng chanchin ten a rilru a luah reng tih a sawi a. Lawngtlai khawpuia chhanchhuahna hna thawk te chanchin a ngaihven tih sawiin, hnathawktu zawng zawng chungah lawmthu a sawi a. An inpekna leh huaisenna a chhuang hle tih a sawi.

Pu Lalduhoma chuan, hmun hrang hrangah chenna in chan te, hmun him lama insuan chhuah ngai te an awm tih sawiin, mi tlawmngai tam takten tanpui ngaite tanpuina an pe mek tih sawiin, an chungah lawmthu a sawi. CM chuan chhiatna tuar

zawng zawng te tan a tawngtai bakah sawrkar chuan chhanchhuahna leh chhawmdawlna lamah a tih theih apiang a ti zel dawn a ni, a ti bawk.

<><><>

LANSDLIDE

Tun hnai ruahsur nasa avangin Kawlkulh khuaah Pu C Laldinchhuaha Workshop Veng in chu leiminin a hnawl a, in hi an lo riah chhuahsan tawh avangin thi leh hliam an awm lo.

Nimin vek khan Kawlkulh khua a Pi Laldinthari Hotel Veng-te in chu ruahsur nasat vanga leiminin a hnawl a, thi leh hliam an awm lo. Pi Laldintharite hian leimin hma hian bungrua an lo thiar chhuak nual tawh a, chutihrualin an kawmthlang ,Pi Laldinthari te Bathroom leh Bedroom chu inchim hian a delh chhe bawk a ni. Inchimte hi nimin lamah mi tlawmngai ten a theih ang angin an seng fel nghal a, chutihrualin ruahsur a ban hleihtheih loh avangin seng fel zawh theih a la ni lo niin thu kan dawng a ni.

<><><>

LAWNGTLAI

Ruah sur nasa avanga May 30 zan dar 10:45 vela Lawngtlai Bazar Veng leh Chandmary Venga Building pathum ve ve chimin a chim hnante chu, nizan khan dam taka lakchhuah kim an ni.

Zirtawpni zankhua leh nimin nileng khan chhanchhuah hna hi CYLA kaihhruihana hnuaiah, State Disaster Response Force (SDRF) 3rd IR Battalion, Thingkah, Assam Rifles, District Disaster Management & Rehabilitation leh CYLA Quick Respone Team ten an thawk a. Building chim hian mi pathum a chim hnan a, nimin chhun khan mi pahnih te chu dam taka chhanchhuah niin, nizan dar 7:50 PM khan pakhat dang chu dam taka chhanchhuah leh a ni. Lei chimin a chim hnan te hi chhanchhuah vek tawh niin tunah hian District Hospital, Lawngtlaiah enkawl mek an ni.

Building chim hian NH- 54 kawngpui a hnawh ping vek a, a thenfai hna hi thawh nghal a ni bawk.

<><><>

BAL VIVAK MUKT BHARAT

Ram pum huapa kum tling lo inneihna tibo tura beihpui thlakna-National Campaign "Bal Vivah MukT Bharat" (Child Marriage Free India) chu Mizoramah pawh kalpui mek a ni.

Akashvani zawhna chhangin, Women and Child Development Deputy Director (ICDS) Pi Sailopari chuan kum tling lo inneihna tibo tura beihpui thlakna hi nikum atang khan Mizoramah an kalpui a ti a, district tina an staff te hnenah training an pe tawh a, Child Marriage Prohibition Officer (CMPO) thenkhat te pawh training an pe tawh tih sawiin heng bakah hian khawtlangah mipuite hrilhhriat niin training an pe

thin a ti a, Home Department te nena Special Juvenile Police Unit-a framework-ah child marriage dah tel turin hma an la mek tih sawiin hemi chungchang ngaihtuah tur hian thutkhawm thuai an tum tih a sawi bawk.

Nikum November ni 27 khan India ram puma naupang kum tling lo inneih tibo tura beihpui thlakna, National Campaign "Bal Vivah Mukta Bharat" chu New Delhi-a Vigyan Bhawan-ah Union Minister for Women and Child Development Pi Annpurna Devi chuan hawngin, kum tling lo inneih venna tur leh a that lohzia inzirtina atan te, kum tling lova nupui pasal nei an awm report siam nana hman tur online platform, 'Child Marriage Free Bharat' portal chu a tlangzarh nghal a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.
Vawiin chawhnu dar 2 leh a chanve-ah Chanchinthar puan leh a ni ang.



P&E

Power & Electricity Department chuan ruah leh thlipuiin Mizoram a nuai chungchangah mipuite hnena ngenna leh hriattirna thuchhuah an siam.

P&E thuchhuah tarlan dan chuan, tunhnaia ruah leh thlipuiin Mizoram a nuai avangin hmun hrang hrangah Power supply a khaihlak nasa em em tih an sawi a. P&E Dept. a hnathawktu ten theihtawp chhuahin ruahpui leh thlipui karah, chhun zan zawmin siam that hna an thawk reng tih sawiin. Chutihlain, thli leh ruah a thawh reng avang hian siamthat hna thawh a sawt thei lova, chumai bakah, power network chhia a awm belh zel bawk a ni, an ti.

Power lak luhna (hruipui) leh sem chhuahna (hruite) hmun tam takah a chhiain, electric ban tam tak a tlu a, Transformer lian (Power Transformer) leh Transformer te (Distribution Transformer) pawh a chhe nual a, hmun then khatah phei chuan leiminin a hnawl te pawh a awm bawk a ni.

Hetianga power supply a khaihlak hi P&E Deptt. chuan pawh an ti tih sawiin, mipuite hriatthiamna an ngen a. Siam that hna hi theihtawpin an thawh chhunzawm reng tih sawiin, dawh thei taka lo hrethiam tur leh theihtawpa tawiawm turin mipuite an ngen a ni.



SILVER MEDAL

India ram pum huap inelna All India Wushu Chamnpionship-a Sub Junior huangah, Mizoram tan Mesak Lalrinawma chuan silver medal a hlawh chhuak.

Inelna hi May 26-31 chhung khan Tami Nadu a Tiruchengode-ah neh niin, Bethlehem Vengthlang naupang Mesak Lalrinawma hi kg 36 huangah a khel a ni.

Mesak Lalrinawma hi first stage a bye a, second stage-ah Delhi aiawhtu a hneh, quarterfinal-ah Kerala awiawh hneh lehin, semifinal-ah Odisha mi a hneh leh. Mahse, final-ah erawh Assam aiawh lakah a vanduai zawkah tangin silver medal a la ta a ni.



Operation Shield

Operation Shield kalpui mek zingah Gujarat-a district hrang hrangah Civil Defence mock drills neih a ni a, ramri-a Kutch, Banaskantha, leh Patan-ah te pawh neih a ni. Drill-ah hian siren hmanga civil mite chhuahtir te, emergency-a chhawmdawlna leh chhanchhuah hna thawh te a tel a ni. Nimin tlai khan Gujarat-a district eng emaw zatah blackout rehearsal neih a ni bawk. District administration-te chuan blackout lai hian mipui zawng zawng chu tlawmngaia tel tur leh thawhpui turin an ngen a. Harsatna awm thei te thlirin civil defense emergency-a inbuatsaihna tihpun leh civil mipuite an inring em tih enchhin nan tih a ni.



Miss World

Nizana Hyderabad-a Miss World inelna vawi 72-na neihah Miss Thailand, Opal Suchata Chuangsri chu Miss World 2025 atan thlan a ni. Ethiopia Hasset Dereje Admassu chu 1st runner up niin, Poland Maja Klajda chu 2nd runner up atan puan a ni bawk. Phuket atanga lo piang kum 22 mi hian hmeichhiate hriselna lama a inrintawkna, khawngaihna leh inpekna hmangin a langsar hle. Khawvel hmun hrang hrang atanga inelna-a rawn tel mi 100 chuang te an inel hnuah Miss World nihna lallukhum hi hlan a ni.

